

Hawj Duzmui Vanzgi Daenj Ndangdaenj

上林县大丰镇中心学校四(2)班 Hoz Yenman/何滢蔓

Youq ngoenz seizdoeng gou seiq bi seizhaenx, rumzbaek cifefe, fwnnit doeksoebsoeb, rumznit camx ndok, lumj duznyaen rongxhuhu nei, dwglau dangqmaz. Seizhaenx gou youq ndaw ranz yawj saw, daxboh daxmeh okbae cawx byaek lo. Yienznaeuz gou naengh youq henz lozfeiz, hoeng lij gamjdaengz ndangnit. Gou yawj gwnz mbonq le raen duzmui vanzgi haenx, caen siengj umj duzde. Hoeng daxmeh gangj, gou langh umj de, de couh deng uq. Sawqmwh, gou siengjdaengz aen banhfap ndeu: Hawj duzmui daenj ndangdaenj! Gou gag ngeix gag doek-saet bae. Sim ngeix: Doiq ya! Doiq ya! Gou baenzlawz lumz liux lo ne? Duzmui hix lau nit bw!

Gou ganjaenj vut saw deuz, diuq roengz gwnz daengq daeuj buet daengz baihnaj gvihbuh, hai gvih, aeu song dauq buhvaq “cunghauh” caeuq “daihhaui”, youh dawz duzmui hung rag daengz gwnz sahfaiz rogding.

Duzmui hung ndang daiq biz lo, buhvaq “cunghauh” yawj hwnjdaeuj ngamjhab. Hoeng baenzlawz daenj cungj daenj mbouj haeujbae, cuengz buh cadi byoengq aen conggh ndeu. Cuengz vaq “daihhaui” ngamjhab, hoeng cuengz buh couh dwg iq lai lo, cij daenj roengz di ndeu ndwi. Gou raen “cunghauh” caeuq “daihhaui” cungj mbouj ngamj, gou gig ndatheiq couh dawz lahlen baihlaeng duzmui rag hai, mbon’ok di faiq ndeu, dawz

faiq yo haeuj baihlaj ndaw denz bae. Yienghneix cuengz buh “daihhaui” cingq daenj ndaej ngamj, gou gig angq, ndawsim angqvauvau.

Seizneix, daxboh daxmeh cawx byaek ma daengz ranz lo, gou angqvau dwk dawz “cozbinj” hawj gyoengqde yawj. Daxboh daxmeh yawjraen le, haenh gou naeuz: “Gvai lai lo, hix gyaueu dangqmaz!” Seizhaenx, daxmeh dawz soujgih aeu hawj duzmui ingjsiengq, couh raen: Duzmui hung vihmaz naengh mbouj hwnjdaeuj ne? Couh cam gou dwg gijmaz saeh ne? Gou dawz saehcingz daj goek daengz byai lwnh hawj gyoengqde dingq. Daxboh daxmeh dingq le riuhaha hwnjdaeuj. Gou sikhaek naj hoengz



hwnjdaeuj, hix mbouj ndei eiqseiq gag riu lo.

Gienh saeh neix gvaqbae roek bi lo, hoeng gou lij geiq youq ndawsim, aenvih ngeix daengz duzmui vanzgi gou ndawsim raeujrubrub, diemz-swdswd nei.

(lauxsae son’gyauq: Vangz Gveiyangh)



Gueng Mou

Ngoenzsinghgiz, gou bae ranz-daiq guhcaemz. Yahdaiq geij ngoenz gonq youq gwnzhaw cawx duzmuu iq gig ndeigyaez ndeu dauq, gij yiengh de bamzbtwt, caen nyex vunz gyauez, cungj hawj gou mbouj ndaej mbouj siengj bae caeuq de ingjsiengq.

Daxmeh bae ndaw reih bang yahdaiq gvak rum, heuh gou banhaet gueng mou iq, gou gig sim’ angq ciep aeu aen yinvu neix. Ndaw sim angq lumj gwn dangzrwi nei, diemzswdswd.

Gou gig vaiq couh loengh ndei mokmou lo, dauj haeuj ndaw ruq bae, gig mizyinx ndwn youq henzde yawj de guhlawz gwn mok. Hoeng duzmuu iq daengx dwk song da yawj gou, mbouj miz gij eiqsei gwn mok. Gou gip hwnj diuz faexmbaenq ndeu “da da da” bae roq aen ruq mou, hoeng de ning hix mbouj ning.

Neix dwg ok maz saeh ne? Gou gyaetuk gyaetngviz, siengj bae siengj dauq caen mbouj rox vihmaz. Sawqmwh siengj daengz gou seiz iq seiz daxmeh bwnq gou gwn haeux gij cingzgingj de, “doiq, de mbouj gwn, gou couh bang de.”

Naeuz guh couh guh, gou gaeuz ndang roengzdaeuj, iet song fwngz bae, lejlej byaij gyawj duzmuu iq, gou daengx ndang saenzdikdik, naj mbaet ndaej hoengzfwgfwg. Duzmuu iq gig dwglau dwk yawj gou, deng lau le doiq dauq laeng bae, itloh doiq daengz henz ciengz bae. “Seizneix yawj

mwngz lij deuz gizlawz bae?” Gou bongh gvaqbae, duzmuu iq sawqmwh diuq hwnjdaeuj daj lajga gou buet deuz bae lo, gij namh lingzsing haenx, sinz haeuj daengx ndang gou caez, caen boihseiz ha.

Gou mbat neix hozhwnj lo, bik duzmuu iq daengz gox ciengz. Mbat neix gou geiqmaenh mbat gyaueu haxbaenh lo, swngzgei de siengj daj lajga gou buet deuz seiz, sikhaek gaemh aeu diuz rieng uqatat haenx, roengzrengz riu hwnjdaeuj. Duzmuu iq caengz deng riu hwnjdaeuj seiz de couh laemx baez ndeu lo, “vek—vek—vek” dwk heuh hwnjdaeuj.

Gou yungh faexmbaenq nyoengx de daengz henz ruq mou, hawj de bak doiq mokmou, hoeng duzmuu iq couh mbouj gwn, lumjbaenz caeuq bouxlawz hozhwnj nei. Gou yungh faexmbaenq moeb gyaueu de mbat ndeu, de mboujdan mbouj gwn, lij daengx gou dem. Duzmuu iq dwg mbouj dwg hozhwnj gou ha? Seizneix, daxmeh cingq dauq daengz lo, gou gig hozhwnj lwnh gij saeh mou mbouj gwn mok neix hawj de nyi. Daxmeh dingq le riuhaha hwnjdaeuj, rub le rub aen- gyaueu gou.

“Gij maz saeh cungj miz goek-gaen, duzmuu iq lau vunzmoq, mwngz bae le de couh gwn lo!”

Dingq le, gou fwt cix singjuk lo. Gou gven dou riengh coq, ndoj youq henz youq, mbouj yaep ndeu couh dingqny gij sing “cub cub cub”, ya! De gwn lo! Gwn lo! Gou yawjyawj daxmeh, sim’ angq riu hwnjdaeuj lo.

(Fan Gyahyez raiz Veiz Yinyiz hoiz)

Vahgaglwnh Mbaw Ngaenz Maenz Ndeu

Ha! Daihgya ndei, gou dwg mbaw ngaenz maenz ndeu, seizneix cingq ninz youq ndaw dak-coqngaenz aen cauhsi ndeu. Daj ngoenz gou ngamq miz haenx heij, gou ndaw hoz couh gag maq-muengh: Gou yaek guh mbaw ngaenz maenz miznaj ndeu. Gou miz haujlai boux doengzdoh, miz boux godaih haj maenz, dahnuengx haj guk……gyoengqde miz di okbae, miz di haeujdaeuj. Gou gyauez dingq gij gojgaeq gyoengqde dangqmaz, gingciengz dingqny mbangj “bouxsaemqgonq” gangj gyoengqde youq baihrog miz maz gojgaeq, gou gig hozhaenz gyoengqde ndaej raen aen biengz baihrog mizyinx dangqmaz.

Gou lumj muengh ndaundeiq muengh ronghndwen ityiengh, daengzlaeng ndaej saedyienh loq-siengj lo! Ngamq haidaeuz seiz, bouxcawj gou dwg daxgoeng gai cijsoemj ndeu. Youq giz de, gou nyinhnaeuz gou sikhaek ndaej ok rog bae, danhseih, gou deng caj baenz ngeihcib bet ngoenz bae, cij miz dahnyez iq ndeu daeuj cawx cijsoemj. Goeng neix cau j gou hawj

dahnyez iq, yienghneix lo, gou daengz ndaw fwngz dahnyez iq. Dahnyez iq neix dwg mbouj dwg mbouj roxsoq ne? De langh coq gou haeuj gizdieg mbouj habngamj bae, neix gou mbouj dwg dengsaeh ha? Gou cingq gag ngeix sam ngeix seiq, baihnaj lwgfwngz baez rongh…… Ya, Dahnyez iq daengz ranz lo! Gou iet gyaueu ok daeuj yaek yawjyawj seiqhenz, hoeng dahnyez iq nyaeb gou okdaeu j, byaij coh aen guenggyaeng ndeu. Dahnyez iq baez hai fwngz, gou couh doek roengz ndaw dungx guenggyaeng bae. Va! Ndaw neix miz haujlai beixnuengx gou, youq giz neix, gou youh gvaq duenh saedceij diemzvan ndeu.

Youq duenh neix, baengzyoux dou haeujdaeuj mbouj dingz mbouj duenh, mboujduenh miz beix-nuengx moq gyahaeuj daeuj, cib maenz ngaenz, haj maenz ngaenz……

Miz ngoenz ndeu, bouxcawj iq comz gyoengq beixnuengx dou guhdoih, coq haeuj aen daeh ndeu bae, dingqny yaek dawz dou gien hawj boux doengz-hag baenz binghlwedhau ndeu. A! Gou rox lo, de yaek guh saehndei ha! Dou coengh de guh

gij saeh ndei neix gig miz yi yi, dou cungj rox daengz neix gig miznaj.

Gou nyinhnaeuz, seizneix gou gaenq baenz mbaw maenz ngaenz miznaj ndeu.

(Houz Gyahgiz raiz Daengningh hoiz)

